

Brunch 7 januari 2012



LIMBURGSE BRUNCH - ZALZERSHAOF 2012

Dit jaor hoofde de Rapido- leeje ens neet door de snieë of euver iès naor de brunch te kômme.
De echte winter leet achter op ut schema en de kós noow gemakkelik op de fiets of te voet de waeg naor Zalzershaof vinde.
In Holt-Bliérick waar unne **Limburgse Brunch** klaor gemak door de bekinde kok

dae al dökker lekker aete veur Rapido haet gemak.
Helmie haet daobeej as deskundige netuurlik unne dieke vinger in de pap, of messchien beej dit buffet, in de kalde schótel gehad.
Rob had veur tössedoor zelfs unne **Limburgse kwis** gemak.
Det brach direk nao ut aete waat laeve in de brouwerie, maar dao euver later.

De kóskepel speulde in eur gala- pekskes de gaste naor binne en de zaal zoog d'r met de aangekleide lange taofels gezellig oèt.
Ut veel beej de joekskepel op det de ièrste riej blaozers allemaol un handdukske op de slup hadde ligge.
Zweite die zoë ônder ut speule of speeje die zoë in eur instrumente?
Dat zoeken we op..... of baeter gezag det vraoge we nao.

Noow ik d'reuver naodink, Pavarotti had auk altièd un dukske beej zich en dae haet euver de ganse waereld op meuge traeye.
Hae bespeulde waal gen instrument maar kós toevallig good zinge, det zal de raeje zien dette everal gevraog woord.
86 minse (waovan 14 kinder) ware op de brunch aaf gekômme en ginge veur en nao aan de lange taofels zitte.

Helmie meus de spits aaf biète en de minse allemaol welkôm heite op de **Limburgse brunch**.
Det ging um good aaf want ik heb gen handdukske gezeen um ut zweit aaf te vaege.
Noow schaelt ut netuurlik asse genne haekel hebs aan praote, dan pakse d'n draod sneller op.
Helmie, veur de volgende speech nog un paar kièr veur ut speegel oefene en de zenuwe zien gans weg.
Alles woord duudelik oètgelag en de organisatie had auk nog un verrassing in petto.

Maar ièrs kwaam de nije veurzitter aan ut woord.
Marcel goof aan dette erg zenuwachtig waar en det kösse aaf en toe huere aan de stum.
Beej de premiére as veurzitter is det gaar genne ramp want de ièrste kièr is altièd ut moeilikstezegge ze.

De geschiedenis van **Rapido** woort aangehaold met name de oprichter van Rapido
en de vurrige veurzitters in de laup van die 50 jaor.
Marcel goof aan dette gaer nog un beroop zoel wille doen



op die ervare minse.

Ik bin d'r van euvvertuug det same met un paar ervare hand in de rök van ôzze nije veurzitter en met hëlpe van alle bestuursleeje de koers van Rapido good te handhave is.

Dan de verrassing: un optraeje van ut **Knapekoër** die ut **Limburgs Volksleed** zônge ônder accordeonbegeleiding van Anneke.

Weej wiste gaar neet det d'r nog "knaapjes" beej Rapido ware en al hielemáol neet op dae laeftièd.

En det in deze tièd, neet te geluive..... daonao mochte we beginne met de tomatesoep met bôlkes, want met bôlkes is de soep pas kômpleet.

Idderein kôs aete wao hae of zeej zin in had, zelfs de **Limburgse bloodwors met gebakke appel** waar neet vergaete.

Tössedoor deilde Rob de kwisvraoge oèt en kôs idderein door nao te dinke, door te googele of door aaf te kièke alle vraoge die betrekking hadde op **Limburg** beantwoorde.

Ut **Knapekoër** had good zien bes gedaon de ièrste kièr en de "knaapjes" of messchien toepasselikker de "knackers"

zônge nog un paar leedjes as slot van eur einmalig optraeje.

Beej de kwis hadde de meiste maar 1 fout gemak en de hes altièd van die mazzelvotte die in de finale mei meuge doen.

Deze kièr gen ex-eekwo spelletje maar Frans haolde 3 mazzelaers oèt de groëte haup um de finale te speule.

Ben Schouren, Wiek Janssen en Wil Rippens kreges alledreej un bel wao op gedouwd meus waere asse ut antwoord wis.

Wiek had tenslotte de meiste vraoge good, det waar nogal wiedes, dae is op schoël gewind um snel op die bel te dauwe of d'r mei te rammele.

Hae kôs same met Hannie ut nije jaor beginne met ein good gevôlde **Limburgse mand**.

Nao ut aete kwaam as toetje un stökske **Limburgse vlaai**, un toepasselikke aafsloëting van deze brunch.

Intösse ware Remco en Bart zich aan ut veurbereide op eur optraeje.

Zeej brachte same in aangepasde kleiding 2 Ierse danse.

De meiste minse kinne waal de riverdance, un idee van Michael Flatley.

In vuel theaters zien d'r jaorliks oètveuringe van.

De danspasse van de oorsprônkelikke Ierse volksdans zien door deze man aangepas en sprik noow vuel mièr minse aan..

Ut baovelichaam môt stil gehalde waere maar de bein gaon in un raozend tempo op en neer en door ut klikke van de schoon op de vloer kriesse unne ritmische tap-dance.

De bein leke waal van illestiek, zoë snel ginge die op en neer.

Ut is gen veur de hand liggende sport veur de meiste jônges.

Waat mich betref jônges kôm ut volgend jaor truuk en bring nog waat collega's mei.

Vuel succes allebei met ôch danswedstrijde.



Al met al weer unne gezellige brunch met gevarieerd entertainment det good bevalle is.

Ik haop det Rapido un positief en sportief jaor tegemoot geit.

Elly van Elswijk